

四庫全書

子部

欽定四庫全書

子部  
冊府元龜卷八百十五  
六

詳校官中書臣孫球

侍讀臣孫球覆勘

總校官庶吉士臣何思鈞

校對官中書臣楊世綸

校對官主事臣張培

謄錄監生臣王錦

謄錄監生臣阮鍾環

欽定四庫全書

冊府元龜卷八百十五

宋 王欽若等 撰

總錄部

誠感

陰德

誠感

禮曰至誠如神易曰觀其所感而天地萬物之情可見矣蓋夫鍾最靈之質陶中和之氣精懇內激冥期潛會乃至湍流自却金石爲開集天澤於旱暵燭異光於幽

晦神交於夢寐德柔於猛鷲殊類擾狎竒徵協應以至  
嶽靈通感海神助順品物效正纍囚不欺斯固繇衷以  
發寂然而通以至情而格于神明君子之爲貴者也

楚熊渠子夜行見寢石以爲伏虎彎弓而射之沒金飲  
羽下視知其石也因復射之矢摧無跡

漢李廣嘗出獵見草中石以爲虎而射之中石沒矢視  
之石也他日射之終不能入矣廣位至前將軍

王尊成帝時爲東郡太守久之河水盛溢泛浸瓠子金

隄老弱奔走恐水決爲害尊躬率吏民投沈白馬効水  
神河伯尊親執圭璧使巫策祝請以身填金隄因止宿  
廬居隄上吏民數千萬人爭叩頭救止尊終不肯去及  
水盛隄壞吏民皆奔走唯一主簿泣在尊旁立不動而  
水波稍却迴還吏民嘉壯尊之勇節

後漢許楊汝南人太守鄧晨署楊都水掾使復立鴻郤  
陂豪右大姓因緣陂役競欲辜較在所楊一無聽遂共  
譖楊受取賂晨遂收楊下獄而械輒自解獄吏恐遽白

晨驚曰晨果濫矣太守聞忠信可以感靈今其效乎即  
夜出楊遣歸時天大陰晦道中若有火光炤之時人異  
焉

陳弇以尚書教授躬自耕種嘗有黃雀飛來隨弇翱翔  
諒輔廣漢人仕郡爲五官掾時夏天旱太守自出祈禱  
山川連日而無所降輔乃自暴庭中慷慨呪曰輔爲股  
肱不能進諫納忠薦賢退惡和調陰陽承順天意至今  
天地否隔萬物焦枯百姓喁喁無所訴告咎盡在輔今

郡太守改服責已爲民祈福精誠懇到未有感激輔今  
敢自祈請若至日中不雨乞以身塞無狀於是積薪柴  
聚茭茅以自環構火其傍將自焚焉未及日中時而天  
雲晦合須臾澍雨一郡沾潤世以此稱其至誠

范式字巨卿與張元伯爲友元伯卒式忽夢見元伯玄  
冕垂纓屣履而呼曰巨卿吾以某日死當以爾時葬永  
歸黃泉子未我忘豈能相及式恍然覺寤悲嘆泣下具  
告太守請往奔喪太守雖心不信而重違其情許之式

便服朋友之服投其葬日馳往赴之式未及到而喪已發引既至壙將窆而柩不肯進其母撫之曰元伯豈有望耶遂停柩移時乃見有素車白馬號哭而來其母望之曰必是范巨卿既至叩喪言曰行矣元伯死生路異永從此辭會葬者千人咸爲揮涕式自執紼而引柩於是乃前式後位至廬江太守

魏管寧北海人避難至於遼東所居左右無鬪訟之聲禮讓移於海表文帝即位徵寧將家屬浮海還郡寧之



還也在海中遇暴風船皆沒惟寧乘船自若時夜風晦  
冥船人盡惑莫知所泊望見火光輒趨之得島島無居  
人又無火燼行人咸異焉以爲神光之佑也後復以安  
車徵之會寧卒

朱冲南安人居近夷俗羗戎奉之若君冲亦以禮讓爲  
訓邑里化之路不拾遺村無凶人毒蟲猛獸皆不爲害  
卒以壽終

晉嵇康遇王烈共入山烈嘗得石髓如飴即自服半餘

半與康皆凝而爲石又於石室中見一卷素書遽呼康往取輒不復見烈乃嘆曰叔夜志趣非常而輒不遇命也其誠心所感每遇幽異如此位至中散大夫

徐苗有志行嘗宿亭舍有神告亭壤遽出得免苗雖微辟皆不就

東晉陽平元城人太康中郡界大旱晷爲邑人請雨三日而雨注衆謂晷誠感爲作歌曰東先生通神明請天三日甘雨零我黍以育我稷以生何以酬之報東長生

督官至尚書郎

陸機吳郡人有駿犬名曰黃耳機在雒謂犬曰我家絕  
無書信汝能齎書取消息不犬搖尾作聲機乃爲書以  
竹筒盛之而繫其頸犬尋路南走遂至其家得報還雒  
其後因以爲常後河間王顥假機後將軍河北大都督  
董景道永平中知天下將亂隱於商雒山衣木葉食樹  
果彈琴歌笑以自娛毒蟲猛獸皆繞其傍是以劉元海  
及聰屢徵皆礙而不達以壽終

顏含二親既終兩兄既沒次嫂樊氏因疾失明含課勵家人盡心奉養每日自嘗省藥饌察問息耗必替履束帶醫人疏方應須舛蛇膽而尋求備至無由得之含憂嘆累時嘗晝獨坐忽有一青衣童子年可十三四持一青囊授含開視乃蛇膽也童子逡巡出戶化成青鳥飛去得膽藥成嫂病即愈繇是著名爲光祿勳致仕卒喪在殯而鄰家失火移棺緋斷火將至而滅僉以爲淳誠所感也

郭文隱居餘杭大壁山中窮谷無人之地倚木於樹苔覆其上而居焉亦無壁郭時猛獸爲暴入屋害人而文獨宿十餘年卒無患害嘗著鹿裘葛巾不飲酒食肉區種菽麥嘗有猛獸忽張口向文文視其橫骨乃以手探去之猛獸明旦致一鹿於其室前

羅舍爲常侍侍中在官舍有一白雀棲集堂宇及致仕還家階庭忽蘭菊叢生以爲德行之感焉

徐義爲慕容永所獲械埋其足將殺之義誦觀世音經

至夜中土開械脫於重禁之中若有人導之者遂奔楊  
佺期佺期以爲雒陽令

宋謝述少有志行隨凡純在江陵純遇害述奉純喪還  
都行至西塞值暴風純喪舫漂流不知所在述尋小船  
尋求之經純妻庾舫遇庾遣人謂述曰喪舫存沒已應  
有在風波如此豈可小船所冒小郎去必無及寧可存  
亡俱盡耶述泣答曰若安全至岸當須營理如其已致  
意外述亦無心獨存因冒浪而進見純喪幾沒述號叫

呼天幸而獲免咸以爲精誠所致也高祖聞而嘉之述  
後位至吳興太守

南齊江泌性行仁義衣弊蟲饑死乃復取置衣中數日  
間終身無復蟲後武帝以爲南康王侍讀卒

顧歡晚節服食不與人通每旦出戶山鳥集其掌取食  
事黃老道解陰陽書詔以太學博士徵之不就

謝昌寓陳郡人也爲廣州叅軍孝性甚至嘗養一鵠昌  
寓疾二旬而鵠二旬不食昌寓亡而鵠遂飛去

虞愿爲晉平太守郡舊出蚺蛇膽可爲藥有餉愿蛇者愿不忍殺放於二十里外山中一夜蛇還牀下復送四十里經宿復還故處愿更令遠送乃不復歸論者以爲仁心所致也

盧度姑興人有道術少隨張永北征永敗虜追急阻淮水不得度過度心誓曰若得免死從今不復殺生須臾見兩楯流來接之得免復隱居西昌三顧山鳥獸隨之夜有鹿觸其壁度曰汝壞我壁鹿應聲去屋前有池養



魚魚次第來取食乃去永明末以壽終

何點盧江潯人也累徵不就少時嘗患渴痢積歲不愈後在吳中石佛寺建講於講所晝寢夢一道人形貌非常授丸一掬夢中服之自此而差時人以為淳德所感何胤居虎丘西寺講論經義嘗禁殺有虞人逐鹿鹿往來趨何伏而不動又有異鳥如鶴紅色集講堂馴狎如家禽焉後詔徵為侍中不就卒

韋鼎初為梁邵陵王主簿侯景之亂鼎兄昂卒於京城

鼎負尸出寄於中興寺求棺無所得鼎哀憤慟哭忽見江中物流至竊竊異之往視乃新棺也因以充殮元帝聞之以爲精誠所感

陳王固爲梁元帝相國戶曹屬掌管記聘於西魏固宴饗之際請停殺一羊於固前跪拜

後周王思政初爲太祖丞相中軍大將軍雖被任委自以非相府之舊每不自安太祖在同州與羣公宴集出錦罽及雜綾絹數段命諸將擣蒲取之物既盡太祖又

解所服金帶令諸人遍擲曰先得盧者即與之羣公將  
軍莫有得者次至思政乃歛容跪坐而自誓曰王思政  
羈旅歸明蒙宰相國士之遇方願盡心効命上報知已  
若此誠有實令宰相賜知者願擲即爲盧若內懷不盡  
神靈亦當明之使不作也便當殺身以謝所奉辭氣慷  
慨一坐盡驚即拔佩刀橫於膝上覽擣蒲拊髀擲之比  
太祖止之擲爲盧矣徐乃拜而受自此之後太祖倚待  
更深轉驃騎將軍

李遠爲都督嘗較獵於莎柵見石在藜薄中以爲伏兔射之而中鏃入寸餘就而視之乃石也太祖聞而異之賜書曰昔李將軍廣親有此事公今復爾可謂世載其德雖熊渠之名不能獨擅其美

張元字孝始河北芮城人年六歲村陌有狗子爲人所棄者元見即收而養之其叔父怒曰何用此爲將欲更棄之元對曰有生之類莫不知其性命若天生天殺自然之理今爲人所棄而死非其道也若見而不收養無

仁心也是以收而養之叔父感其言遂許焉未幾乃有  
狗母銜一死兔置元前而去

隋王伽河間童武人開皇末爲齊州行叅軍初無雅稱  
後被州使送流囚李叅等七十餘人詣京師時制流人  
竝枷鎖傳送伽行次滎陽伽哀其辛苦悉呼而謂之曰  
卿輩既犯國刑虧損名教身嬰縲紲此其職也今復重  
勞援卒豈獨不愧於心哉叅等辭謝伽曰汝等雖犯憲  
法枷鎖亦大苦吾欲與汝等脫去行至京師總集能不

違期否皆拜謝曰必不敢違伽於是悉脫其枷停援卒  
與期曰某日當至京師如致前却吾當爲汝受死舍之  
而去流人感悅依期而至一無離叛帝聞而驚異之召  
見與語稱善久之於是悉召流人并令携負妻子俱入  
賜宴於殿庭而赦之擢伽爲雍令

郭雋字宏文太原文水人家門雍穆七葉共居犬豕同  
乳烏鵲通巢時人以爲義感之應州縣上其事高祖遣  
平昌公宇文弼詣其家勞問之持書御史柳彧巡省河

北表其門閭

唐裴寂字元真年十四州補主簿隋開皇中爲左親衛  
家貧無以自業每徒步詣京師嘗至華岳因祭神而祝  
曰裴元真窮困至此敢修誠謁神之有靈鑒其運命  
若富貴可期當降吉夢再拜而去夜夢白頭翁謂寂曰  
卿年四十以後方可得志終當位極人臣耳

唐臨爲萬泉丞縣有輕囚十數人會春暮時雨臨白令  
請出之令不許臨曰明公若有所疑臨請自當其罪令

因請假臨召囚悉令歸家耕種與之約期令歸繫所囚等皆感恩貸至時畢集詣獄臨囚是知名

王隴德本馮翊王藏仁之蒼頭也藏仁父母先沒未獲合葬既而從役物故其妻孀居旁無親屬隴德迎致其屍并其父母而葬之因廬其墓以負土成墳每有雉悲鳴於墳上焉太宗幸長春宮記表其閭

王義方坐與張亮交遊貶授儋州吉安丞行至南海舟人將以酒脯致祭義方曰黍稷非馨義在明德乃酌水



而祭爲文曰思帝鄉而北顧望海浦而南浮必也行愆  
諸已義負前修長鯨擊水天吳覆舟如因忠獲戾以孝見  
尤四維霧廓千里安流靈應如響無作神羞時當盛夏  
風濤蒸毒既而開霽南渡數歲改授洹水丞

歸崇敬大歷中爲倉部郎中充冊立新羅王使至海中  
流波濤迅急舟船壞漏衆咸驚駭舟人請以小艇載崇  
敬避禍崇敬曰舟人凡數百我何獨濟逡巡波濤稍息  
竟免爲害

李康威少好勇不拘小節自布素中以飲博爲事漁陽士子多忌之曾一日與諸遊俠輩釣於桑乾赤欄橋之側自以酒禱曰吾若有幽州節度分則獲一大魚俄有餌鉤者隨手持之得鯉魚長三尺餘人甚異焉後果鎮

幽州

後唐內臣張承業爲監軍夾城之役遣承業求援於鳳翔時河中阻絕自離石渡河春水方泮凌澌奔蹙艤舟不得渡因禱河神是夜夢神人謂曰子但渡流水無患

既寤津吏報曰河水合矣凌晨躡冰而濟旋踵冰解

周徐台符晉末爲翰林學士契丹之陷中原也台符從  
虜帳北至於薊門及戎人內潰乃竄身南歸初台符所  
乘馬性好嘶鳴及自虜中迴嘗露宿於草中雖胡騎連  
羣經其左右而台符馬若箝其口然及行至漢地即嘶  
鳴如故時人以爲積善之所感也

段希堯初仕晉爲右諫議大夫使于吳越及乘舟汎海  
風濤暴越檝師僕從皆相顧失色希堯謂左右曰吾生

平履行不欺暗室昭昭天鑒豈無佑乎汝等但以吾爲託必當無患言訖而風止乃獲利涉

陰德

夫明晦之際雖則有殊而善惡之報誠亦無忒是以爲善則錫之福而昌厥世爲惡則降之咎而殛其身蓋如影響之相須符契之胥合者也若乃濟危難恤羈孤慎罰緩死以存乎性命危言切諫以申乎幽寃迨及骼胔之類鳥獸之微莫不形惻隱之心成全活之惠故能恩

洽於物慶流於家成必大之徵享無疆之祐貽孫翼子  
乃公乃侯足以見天道之不誣人心之可復者爾

魏顆父武子爲晉大夫有嬖妾無子武子疾命顆曰必  
嫁是疾病疾甚曰病則曰必以爲殉及卒顆戒之曰疾病則

亂吾從其治也及輔氏之役顆見老人結草以亢杜回

亢禦也杜回  
秦之力士杜回躓而顛故獲之夜夢之曰余爾所嫁

婦人之父也爾用先人之治命余是以報

韓厥晉人感晉景公紹趙孤之子武以成程嬰公孫杵

曰之義此天下之陰德也韓氏之功於晉未覩其大者也然與趙魏終爲諸侯十餘世宜乎哉

孫叔敖楚人初爲兒出遊歸遂憂而不食其母問其故泣而對曰吾聞見兩頭蛇必死吾恐人又見之殺而埋之母曰無憂汝不死矣吾聞有陰德者天必報之以福果不死

漢丙吉字少卿武帝末巫蠱事起吉以故廷尉監徵詔治巫蠱郡邸獄連歲不決後元二年武帝疾徃來長楊

五柞宮

長楊五柞宮並在藍屋往來二宮之間

望氣者言長安獄中有天

子氣於是帝遣使者分條中都官詔獄繫

條謂疏錄之

亡輕

重一切皆殺之內者令郭穰夜到郡邸獄吉閉門拒使者不納曰皇曾孫在他人亡辜死者猶不可况親曾孫乎相守至天明不得入穰還以聞因劾奏吉武帝亦寤曰天使之也因赦天下郡邸獄繫者獨賴吉得生恩及四海也

吉拒閉使者天子感寤乃普赦天下其郡邸繫于獄者既因吉得生而赦宥之恩遂及四

海也

及曾孫立是爲宣帝吉爲人深厚不伐善自曾孫遭

遇吉絕口不道前恩

遭遇謂升大位也

故朝廷莫能明功也後

帝知吉有厚恩封吉為博陽侯邑千三百戶臨當封吉

疾病帝將使人加紼而封之及其生存也

紼繫印之系也

帝憂

吉疾不起太子太傅夏侯勝曰此未死也臣聞有陰德

者必饗其樂以及子孫今吉未獲報而疾甚非其疾也

後病果愈後五歲代魏相為丞相

于定國父于公

史失其名

其閭門壞父老方共治之

閭門里門也

于公謂曰少高大閭門令容駟馬高車我治獄多陰德



未嘗有所寃子孫必有興者至定國爲丞相永爲御史大夫封侯傳世

王翁孺爲綉衣御史逐捕羣盜及吏畏懦逗留當坐者翁孺皆縱不誅以奉使不稱嘆曰吾聞活千人有封子孫吾所活者萬餘人後世其興乎

後漢何敞六世祖比干字少卿經明行修兼通法律爲汝陰縣獄吏決曹掾平活數千人

一云比干武帝時爲廷尉與張湯同時湯

持法深而比干務仁恕數與湯爭雖不能盡得然所濟活者以千數後爲丹陽都尉獄無

寃囚淮汝號曰何公武帝征和三年三月辛亥天大陰  
雨比干在家日中夢貴客車騎滿門覺以語妻語未已  
而門有老嫗可八十餘頭白求寄避雨雨甚而衣履不  
濡漬雨止送至門乃謂比干曰公有陰德今天賜君策  
以廣公之子孫因出懷中策符狀如簡長九寸凡九百  
九十枚以授比干子孫佩印綬者當如此算比干年五  
十八有男六又生三子宣帝本始元年自汝陰徙平陵  
代爲名族

臣欽若等曰案後漢書比干生蜀郡太守壽  
壽生京輔都尉顯顯生光祿大夫駟駟生濟

南太守寵寵生五  
官中郎將敬也

鄧禹爲太傅嘗嘆曰吾將百萬之衆未嘗妄殺一人其  
後代必有興者禹子咳又言嘗聞活人者子孫有封兄  
訓爲使者修石曰河歲活數千人天道可信家必蒙福

臣欽若等曰按後漢書訓子騭悝宏  
閻皆封萬戶侯訓女卽和熹皇后也

虞詡陳國武平人祖父經爲郡縣獄吏按法平允務存  
寬恕每冬月上其狀嘗流涕隨之嘗稱曰東海于公高  
爲里門而其子定國卒至丞相吾決獄六十年矣雖不

及于公其庶幾乎子孫何必不爲九卿邪故字詡曰升  
卿詡後爲司隸校尉尚書僕射

梁商曾祖父統更始二年爲中郎將安集涼州商女卽  
順烈皇后也后少善女工好讀書史商深異之竊謂諸  
弟曰我先人全濟河西所活者不可勝數雖大位不究  
而積德爲報若慶流子孫者儻興此女乎

袁安字邵公好學有威重明帝朝爲楚郡太守治楚王  
獄所申理者四百餘家皆蒙全濟安遂爲名臣章帝時

至司徒生蜀郡太守京弟敞爲司徒京子陽爲太尉陽  
四子長子平平弟成左中郎將成弟逢逢弟隗皆爲公  
楊震華陰人父寶年九歲時至華陰山北見一黃雀爲  
鴟梟所搏墜於樹下爲螻蟻所困寶取之以歸置巾箱  
中唯食黃花百餘日毛羽成乃飛去其夜有黃衣童子  
向寶再拜曰我王母使者君仁愛救拯實感成濟以白  
環四枚爲寶令君子孫潔白位登三事如此環矣

臣欽  
若等

曰按後漢書震與子兼曾孫  
彪俱爲太尉孫賜爲司徒

王忱廣漢新都人嘗詣京師於空舍見一書生疾困愍而視之書生謂忱曰我當到雒陽而被病命在須臾胛下有金十斤願以相贈死後乞藏骸骨未及問姓名而命絕忱即鬻一斤營其殯葬餘金悉置棺下久無知者後歸數年縣署忱大度亭長初到之日有馬馳入亭中止其日大風飄一繡被復墮忱前即言之於縣縣以歸忱忱後乘馬到譙縣馬遂奔走牽忱入宅舍主人見之喜曰今擒盜矣問忱所由得馬忱具說其狀并及繡被

主人悵然良久乃曰被隨旋風與馬俱亡卿何陰德而  
致此二物恠自念有葬書生事因說之并道書生形貌  
及埋金之處主人大驚號曰是我子也姓金名彥前往  
京師不知所在何意卿乃葬之大恩久不報天以此章  
卿德耳恠悉以被馬還之彥父不取又厚遺恠恠辭讓  
而去時彥父爲州從事因告新都令假恠休息自迎彥  
喪餘金具存恠由是顯名

晉孔愉以討華軼功封餘不亭侯愉嘗行經餘不亭見

籠龜於路者愉買而放之溪中龜中流左顧者數四及是鑄侯印而印龜左顧三鑄如初印工以告愉乃悟遂佩焉

毛寶初在昌武軍人有如市買得一白龜長四五寸養之漸大放於諸江中邾城之敗養龜人被鎧持刀自投於水中如覺墮一石上視之乃先所養白龜長五六尺送至東岸遂得免焉

殷仲堪遊於江濱見流棺接而葬焉旬日間門前之溝



忽起爲岸其夕有人通仲堪自稱伯玄云感君之惠無以報也仲堪因問門前之岸是何祥乎對曰水中有岸其名爲洲君將爲州言終而沒至是果臨荊州

後魏高允爲中書侍郎轉令監評刑三十餘載中外稱平以孝文太和十一年卒年九十八初允每謂人曰吾在中書有陰德濟救民命若陽報不差吾壽應享百年矣先卒旬外微有不適尤不寢臥呼醫請藥出入行止吟詠如常高祖文明太后聞而遣醫李循往脉視之告

以無恙循入密陳允榮衛有異懼其不久於是遣使備  
賜御膳珍羞自酒米至於鹽醢百有餘品皆盡時味及  
牀帳衣服茵被尺杖羅列於庭王官往還慰問相屬允  
喜形於色語人曰天恩以我篤老大有所賚得以瞻容  
矣表謝而已不有他慮如是數日夜中卒家人莫覺

唐徐有功則天時爲司刑丞酷吏周興來俊臣丘神勣  
等搆陷無辜皆抵極法詔下大理者有功皆議出之前  
後濟活數十百家累遷司刑少卿以諫奏枉誅者三經

斷死而執志不渝酷吏由是少衰時人比漢之于張馮  
先是潤州刺史竇孝謹妾龐氏爲奴所誣當坐斬有功  
明其無罪於是龐氏減死有功至則天長安中卒玄宗  
踐祚孝謹子希珽等請以身之官爵讓有功子倫以報  
舊恩倫由是自太子司議即遷恭陵令

陸元方則天時爲宰相臨終曰吾陰德於人多矣其後  
庶幾福不衰矣元方子象先爲玄宗宰相景倩爲監察  
御史景融爲工部尚書景獻爲屯田員外郎景允爲庫

部郎中皆有美譽

裴度爲東都畱守文宗太和九年十一月李訓王涯賈  
餗舒元輿等被誅其親屬門人從坐者數十百人下獄  
訊劾欲加流竄度上疏理之全活者數十家

冊府元龜卷八百十五

欽定四庫全書

冊府元龜卷八百十六 宋 王欽若等 撰

總錄部

訓子

傳曰父慈而教蓋父子之道篤乎天性愛之所鍾成欲其善誘掖勗導必以義方兼資以恭獎勵其志故士之克荷世德有立於世者未始不先乎嚴君之誨也是以子之能仕則曰父教之忠不就師傅則曰父之罪也然

則於其幼也嘗視無誑及其長也弗納於邪至於女子之有行亦結褵以申戒故能宜於夫族正其家道至於天倫致美義篤於昆弟猶子均愛情厚於諸父率有嘉話申乎勸率并而述之咸可尚矣

周公相成王而使其子伯禽代就封於魯周公戒伯禽曰我文王之子武王之弟成王之叔父我於天下亦不賤矣然我一沐三握髮一飯三吐哺起以待士猶恐失天下之賢今子之魯慎無以國驕人又曰君子不施其

親施易也不以他人之親易已之親不使大臣怨乎不以以用也怒故

舊無大故則不棄也無求備於一人大故謂惡逆之事又曰善

則得之不善則失之故君子於其身也且猶善則得之不善則失之況教其子孫乎

范武子晉大夫也將老老致仕初受隨故曰隨武子后更受范復為范武子召文

子曰變乎吾聞之喜怒以類者鮮文子士會之子變其名易者實

多易遷怒也詩曰君子如怒亂庶遄沮君子如祉亂庶遄已

詩小雅篇遄連也君子之喜怒以已亂也弗已者必益

之邵子其或者欲已亂於齊乎不然余懼其益之也余

將老使邵子逞其志庶有亨乎

亨解也欲使邵子從政快志以止亂

爾從

二三子唯敬

二三子晉諸大夫

乃請老後文子暮退於朝武子

曰何暮也對曰有秦客廋辭於朝

廋隱也謂以隱伏詭譎之言問於朝也

大夫莫之能對也吾知三焉武子怒曰大夫非不能也

讓父兄也爾童子何知而三掩人於朝吾不在晉國亡無

日矣擊之以杖折委笄

委冠也笄替也

孔子謂其子鯉曰女為周南召南矣乎人而不為周南



召南其猶正牆面而立也與

周南召南國風之始樂得淑女以配君子三綱之首

五教之端故人而不為如向牆而立

陳亢問於伯魚曰子亦有異聞乎

亢

伯魚孔子之子所聞當有異

對曰未也嘗獨立

獨立謂孔子

鯉趨而過庭

曰學詩乎對曰未也不學詩無以言鯉退而學詩他日又獨立鯉趨而過庭曰學禮乎對曰未也不學禮無以立鯉退而學禮聞斯二者陳亢退而喜曰問一得三聞詩聞禮又聞君子之遠其子也

孟釐子魯大夫病且死誠其嗣懿子曰孔丘聖人之後

聖人謂孔子六世祖孔父嘉為宋滅於宋華督所殺其子奔魯也其祖弗父何

始有宋而嗣讓厲公弗父何孔父嘉之高祖宋懿公之長子厲公之凡也何嫡嗣當立以讓厲

公也及正考父佐戴武宣公正考父弗父何之曾孫三命茲益恭故

鼎銘云三命上卿也考父廟之鼎一命而僂再命而偃三命而俯循

牆而走亦莫敢余侮饘於是粥於是以飶余口其恭如

是吾聞聖人之後雖不當世必有達者今孔丘年少好

禮其達者歟吾即沒若必師之及釐子卒懿子與魯人

南宮敬叔往學禮焉

曾參仲尼弟子也參有疾其子曾元抑首曾華奉足曾子曰微乎吾無顏氏之言吾何以告汝哉雖然君子之務亦大有之矣夫鹿以山為卑而增巢乎其上魚鼈鼃以淵為淺而滔穴乎其中卒其所以得者餌也故君子能無以利害義則辱奚繇至哉

漢張負以女孫嫁陳平戒其孫曰毋以貧故事人不謹

事兄伯如事迺父嫂如事迺母

迺汝也

石奮號萬石君以上大夫祿歸老于家徙居陵里

茂陵邑中

里之中子內史慶醉歸入外門不下車奮聞之不食慶恐

肉袒謝請罪不許舉宗及兄建肉袒萬石君讓曰內史

貴人入閭里里中長老皆走匿而內史坐車中自如固

當

此深責之也言內史責人正固當爾

迺謝罷慶

告令去

慶及諸子入里門

趨至家

王吉為昌邑中尉坐昌邑王淫亂不能輔道被刑後戒

子孫毋為王國吏子駿遷趙內史道病免官歸

韓延壽為左馮翊棄市三子皆為郎吏且死屬其子勿

為吏以已為戒子皆以父言去官不仕至孫威乃復為吏

尹賞為執金吾病疾且死戒其諸子曰大夫為吏正坐殘賊免追思其功效則復進用矣一坐軟弱不勝任免終身廢棄無有赦時其羞辱甚於貪污坐賊慎毋然賞四子皆至郡守長子立為京兆尹皆尚威嚴有治辨名後漢陳寵曾祖父咸成哀間以律令為尚書性仁恕嘗戒子孫曰為人議法當依於輕雖有百金之利慎無與人重

比

王丹子有同門生喪親家在中山白丹欲往奔慰結侶

將行丹怒而撻之

丹怒撻之五十

令寄縑以祠焉

寄帛二疋以祠焉

或

問其故丹曰交道之難未易言也世稱管鮑次則王貢

丹官至太子太傅遜位卒於家

譙玄隱藏田野終公孫述之世時兵戈累年莫能修尚

學業玄獨訓諸子勤習經書

鄧禹為太傅有子十三人各使守一藝修整閨門教養

子孫皆可以為後世法

馬援為伏波將軍兄子嚴敦並喜譏議而通輕俠客援前在交趾遺書戒之曰吾欲汝曹聞人過失如聞父母之名耳可得聞口不可得言也好論議人長短妄是非正法此吾所大惡也寧死不願聞子孫有此行也汝曹知吾惡之甚矣所以復言者施衿結襦申父母之戒欲使汝曹不忘之耳龍伯高敦厚周慎口無擇言謙約節儉廉公有威吾愛之重之願汝曹效之杜季良豪俠好

義憂人之憂樂人之樂清濁無所失父喪致客數郡畢  
至吾愛之重之不願汝曹效也效伯高不得猶為謹勅  
之士所謂刻鵠不成尚類鶩者也效季良不得陷為天  
下輕薄子所謂畫虎不成反類狗者也訖今季良尚未  
可知郡將下車輒切齒州郡以為言吾嘗為寒心是以  
不願子孫效也季良名保後果為仇人訟免官

竇武為城門校尉兄子紹為虎賁中郎將紹性疎簡奢  
侈武每數切厲相戒猶不覺悟乃上書求退紹位又自



責不能訓導當先受罪繇是紹更遵節大小莫敢違犯  
鄭玄北海高密人嘗疾篤自慮以書戒子益恩曰吾家  
舊貧為父母羣弟所不容去廝役之吏游學周秦之都  
往來幽并兗豫之域獲覲乎在位通人處逸大儒得意  
咸從捧手有所受焉遂博稽六藝粗覽傳記時覩秘書  
緯術之奧年過四十乃歸供養假田播殖以娛朝夕遇  
閻尹擅勢坐黨禁錮十有四年蒙赦令舉賢良方正有  
道辟大將軍三司府公車再召比牒併名早為宰相唯

彼數公懿德大雅克堪王臣故宜式序吾自忖度無任  
於此但念述先聖之元意思整百家之不齊亦庶幾以  
竭吾才故聞命固從而黃巾為害萍浮南北復歸邦鄉  
入此歲來已七十矣宿業衰落仍有失誤案之禮典便  
合傳家今吾告爾以老將閒居安性覃思終業自非拜  
國君之命問族親之憂展敬墳墓觀省野物胡嘗扶杖  
出門乎家事大小汝一承之咨爾煢煢一夫曾無同生相  
依其勗求君子之道研鑽勿替敬慎威儀以近有德顯

譽成於僚友德行立於己志若致聲稱亦有榮於所生  
可不深念邪吾雖無紱冕之緒頗有讓爵之高自樂以  
論贊之功庶不遺後人之羞末所憤憤者徒以亡親墳  
壟未成所好羣書率皆腐敝不得於禮堂寫定傳與其  
人日西方暮其可圖乎家今差多於昔勤力務時無恤  
饑寒菲飲食薄衣服節夫二者尚令吾寡恨若忽忘不  
識亦已焉哉後公車徵為大司農玄以病自乞還家

魏李豐年十七八在鄴下名為清白識別人物莫不注

意後隨軍在許昌聲稱日隆其父不願其然遂令閉門  
勅使斷客

劉廙弟偉與魏諷善廙戒之曰夫交友之美在於得賢  
不可不詳而世之交者不審擇人務合黨衆違先聖人  
交友之義此非厚己輔仁之謂也吾觀魏諷不修德行  
而專以鳩合為務華而不實此直攬世沽名者也知其  
慎之勿復與通偉不從後為諷所引故及於難廙官至  
侍中卒

王昶嘗為其兄子族子作名字皆依謙實以見其意故  
兄子默字處靜沈字處道其子渾字玄沖深字道沖遂  
書戒之曰夫人為子之道莫大於保身全行以顯父母  
此三者人知其善而或危身破家陷於滅亡之禍者何  
也繇所祖習非其道也夫孝敬仁義百行之首行之乃  
立身之本也孝敬則宗族安之仁義則鄉黨重之此行  
成於內名著於外也人若不篤至行而背本逐末以  
陷浮華焉以成朋黨焉浮華則有虛偽之累朋黨則有

彼此之患此二者之戒昭然著明而循覆車滋衆逐末  
彌甚皆繇惑當時之譽昧目前之利故也夫富貴聲名  
人情所樂而君子或得而不處何也惡不繇其道耳患  
人知進而不知退知欲而不知足故有困辱之累悔吝  
之咎語曰如不知足則失所欲故知足之足常足矣覽  
往事之成敗察將來之吉凶未有干名要利欲而不厭  
而能保身持家永全福祿者也欲使汝曹立身行道遵  
儒者之教履道家之言故以玄默沖虛為名欲使汝曹

顧名思義不敢違越也古者盤盂有銘几杖有誠俯仰  
察焉用無過行況在己名可不戒之哉夫物速成則疾  
亡晚就則善終朝華之草夕而零落松柏之茂隆寒不  
衰是以大雅君子惡速成戒闕黨也若范白對秦客而  
武子擊之折其委筭惡其掩人也夫人有善者鮮不自  
伐有能者寡不自矜伐則掩人矜則陵人掩人者人亦  
掩之陵人者人亦陵之故三郤為戮於晉王叔負罪於  
周不惟矜善自伐好爭之咎乎故君子不自稱非以讓

人惡其蓋人也夫能屈以為伸讓以為得弱以為彊鮮不遂矣夫毀譽愛惡之原而禍福之機也是以聖人慎之孔子曰吾之於人誰毀誰譽如有所譽必有所試又曰子貢方人賜也賢乎哉我則不暇以聖人之德尚猶如此況庸庸之徒而輕毀譽哉昔伏波將軍馬援戒其兄子言聞人之惡當如聞父母之名耳可得而聞口不可得而言也斯戒至矣人或毀已當退而求之於身若己有可毀之行則彼言當矣若己無可毀之行則彼言妄



矣當則無怨於彼妄則無害於身又何反報焉且聞人  
毀已而忿者惡醜聲之加人也人報者滋甚不如默而  
自己也諺曰救寒莫如重裘止謗莫如自修斯言信矣  
若與是非之士凶險之人近猶不可況於對校乎其害  
深矣虛偽之人言不根道行不顧言其為浮淺較可識  
別而世人惑焉由不檢之以言行也近濟陰魏諷山陽  
曹偉皆以傾邪敗沒熒惑當世挾持姦慝驅動後生雖  
刑於鈇鉞大為炯戒然所污染固以衆矣可不慎與若

夫山林之士夷叔之倫甘長饑於首陽安赴火於綿山  
雖可以激貪勵俗然聖人不可為吾亦不願也今汝先  
人世有冠冕惟仁義為名守慎為稱孝悌於閨門務學  
於師友吾與時人從事雖出處不同然各有所取潁川  
郭伯益好尚通達敏而有知其為人弘曠不足輕貴有  
餘得其人重之如山不得其人忽之如草吾以所知親  
之昵之而不願兒子為之北海徐偉長不治名高不求  
苟得澹然自守惟道是務其有所是非則託古人以見

其意當時無所褒貶吾敬之重之願兒子師之東平劉  
公幹博學有高才誠節有大意然性行不均少所拘忌  
得失足以相補吾愛之重之不願兒子慕之樂安任昭  
先淳粹履道內敏外恕推遜恭讓處不避污怯而義勇  
在朝忘身吾友之善之願兒子遵之若引而伸之觸類  
而長之汝其庶幾舉一隅耳及其用財先九族其施舍  
務周急其出入存故老其論議貴無貶其進仕尚忠節  
其取人務道實其處勢戒驕淫其貧賤慎無戚其進退

念合宜其行事加九思如此而已吾復何憂哉昶位至司空

蜀向朗字巨達遺言戒子曰傳稱師克在和不在衆此言天地和則萬物生君臣和則國家平九族和則動得所求靜得所安是以聖人守和以存以亡也吾楚國之小子耳而早喪所天為二兄所誘養使其性行不隨祿利以墮今但貧耳貧非人患惟和為貴汝其勉之朗終於左將軍

吳潘濬武陵人為太常歸義隱蕃以口辨為豪傑所善  
濬子翥亦與周旋饋餉之濬聞大怒疏責翥曰吾受國  
厚恩志報以命爾輩在都當念恭順親賢慕善何故與  
降虜交以糧餉之在遠聞此心震面熱惆悵累旬疏到  
急就往使受杖一百促責所餉當時人咸怪濬而蕃果  
圖叛誅夷眾乃歸服

顧雍為丞相時大帝嫁從女女顧氏甥故召雍父子及  
孫譚譚為選曹尚書見任貴重是日帝極歡譚醉酒三

起舞舞不知止雍內怒之明日召譚訶責之曰君王以  
含垢為德臣下以恭謹為節昔蕭何吳漢並有大功何  
每見高帝似不能言漢奉光武亦信恪勤汝之於國寧  
有汗馬之勞可書之事邪但階門戶之資遂見寵任耳  
何有舞不復知止雖為酒後亦繇恃恩忘敬謙虛不足  
損吾家者必爾也因背向壁卧譚立過一時乃見遣

晉王祥為太保臨薨訓其子曰夫言行可覆信之至也  
推美引過德之至也揚名顯親孝之至也兄弟怡怡宗

族欣欣悌之至也臨財莫過乎讓此五者立身之本顏子所以為命未之思也夫何遠之有子皆奉而行之

夏侯湛作昆弟誥其辭曰惟正月哉生魄湛若曰咨爾昆弟淳琬瑄謨總瞻古人有言孝乎惟孝友于兄弟死喪之戚兄弟孔懷又曰周之有至德也莫如兄弟於戲古之載于訓籍傳于詩書者厥乃不思不可不行爾其專乃心一乃聽砥礪乃性以聽我之格言淳等拜手稽首湛若曰嗚呼惟我皇乃祖滕公肇隆厥德厥功以左右

漢祖弘濟于嗣君用垂祚于後世世增敷前軌濟其好  
行美德明允相繼冠冕胥及以逮于皇曾祖愍侯寅亮  
魏祖用康又厥世遂啓土宇以大綜厥勲于家我皇祖  
穆侯崇厥基以允釐顯志用恢闡我令業維我后府君侯  
祇服哲命欽明文思以熙柔我家道丕隆我先緒欽若  
稽古訓用敷訓典籍乃綜其微言嗚呼自三墳五典八  
索九丘圖緯六藝百家衆流罔不探賾索隱鈎深致遠  
洪範九疇彞倫攸叙乃命世立言越用繼尼父之大業



斯文在茲且九齡而我王母薛妃登遐我后孝思罔極  
惟以奉于穆侯之繼室蔡姬以致其子道蔡姬登遐隘  
于穆侯之命厥禮乃不得成用不祔于祖姑惟乃用騁  
其永慕厥乃以疾辭位用遜于厥家布衣席橐以終于  
三載厥乃古訓無文我后丕孝其心用假于厥制以穆  
于世父使君侯惟伯后聰明厥智奕世載德用慈友于  
我后我惟烝烝是虔罔不克承厥誨用增茂我敦薦以  
播休美于一世厥乃可不遵惟我用夙夜匪懈日績其

道而仰之彌高鑽之彌堅我用欲罷不敢豈惟予躬是  
懼實令跡是奉厥乃晝分而食夜分而寢豈惟令跡是  
畏實爾猶是儀嗚乎予其敬哉俞予聞之周之有至德  
有婦人焉我母氏羊姬宣慈愷悌明粹篤誠以撫訓羣  
子厥乃我亂齒則受厥教于書學不遑惟寧敦詩書禮  
樂孳孳弗倦我有識惟與汝服厥誨惟仁義惟孝友是  
尚憂深思遠祇以防于微翳義形於色厚愛平恕以濟  
其寬裕用緝和我七子訓誥我五妹惟我兄弟姊妹束

修慎行用不辱於冠帶實母氏是憑予其為政叢爾惟母  
氏仁之不行是戚予其望色思寬獄之不情教之不泰  
是訓予其納戒思詳嗚呼惟母氏信著于不言行感于  
神明若乃恭事于蔡姬敦穆于九族乃高于古之人古  
之人厥乃千里承師矧我惟父惟母世德之餘烈服膺  
之弗可及景仰之弗可階汝其念哉俾羣弟天祚於我  
家俾爾咸休明是履淳英哉文明柔順琬乃沈毅篤固  
惟瑄厥清粹平理謨茂哉雋哲寅亮總其弘肅簡雅瞻

乃純鑠惠和惟我蒙蔽極否于義訓嗟爾六弟汝其滋  
義洗心以補予之尤予乃亦不敢忘汝之闕嗚呼小子  
瞻汝其見予之長於仁未見予之長於義也瞻曰俞以  
如何湛若曰我之肇于總角以逮于弱冠暨于今之二  
毛受學於先載納誨於嚴父慈母子其敬忘于厥身而  
匡予之纖介翼予之小疵使予有過未曾不知予知之  
道改惟冲子是賴予親于心愛于中敬于貌厥乃口無  
擇言柔而直廉而不剝肅而不厲厥其成予哉用集我

父母之訓庶明勵翼邇可遠在茲瞻拜手稽首曰俞湛  
曰都在修身在愛人瞻曰吁惟聖其難之湛曰都厥不  
行惟難厥行惟易淳曰俞明而昧崇而卑沖而恒顯而  
賢同而疑厲而柔和而矜湛曰俞乃言厥有道淳曰俞  
祇服訓湛曰來琬汝亦昌言琬曰俞身不及於人不敢  
墮於勤厥故惟新湛曰俞瑄亦昌言瑄曰俞滋敬于己  
不滋敬于己惟敬乃恃無忘有恥湛曰俞謨亦昌言謨  
曰俞無忘於不可不虞形貌以心訪心於虞湛曰俞總

亦昌言總曰俞若憂厥憂以休湛曰俞瞻亦昌言瞻曰  
俞復外惟內取諸內不忘諸外湛曰俞休哉淳等拜手  
稽首湛亦拜手稽首乃歌曰明德復哉家道休哉世祚  
悠哉百祿周哉又作歌曰訊德恭哉訓翼從哉內外康  
哉皆拜曰欽哉湛官至散騎常侍

阮籍為步兵校尉子渾有父風少慕通達不飾小節籍

謂曰仲容已豫吾此流

咸字仲容  
籍兄子

汝不得復爾

荀勗語諸子曰人臣不密則失身樹私則背公是大戒

也汝等亦宦達人宜識吾此意最後為尚書令卒

庾袞有兄孤女曰芳將嫁美服既具袞乃割荆荍為篲  
帚召諸子集之于堂男女以班命芳曰芳乎汝少孤汝  
逸汝豫不汝疵瑕今汝適人將事舅姑灑掃庭內婦道  
也故賜汝此匪器之為美欲溫恭朝夕雖休勿休也袞  
雖州郡交命察孝廉舉清白異行皆不就

劉殷為侍中太保錄尚書事有七子五子各授一經一  
子授太史公一子授漢書一門之內七業俱興北州之

學殷門為盛嘗戒其子孫曰事君之法當務幾諫凡人尚不可面斥其過而況萬乘乎夫犯顏之禍將彰君過宜上思召公咨商之義下念鮑勳觸鱗之誅

東海王越鎮許時王承為記室叅軍越雅相知重勅其子毗曰夫學之所益者淺體之所安者深閑習禮度不如式瞻儀形諷味遺言不若親承音旨王叅軍人倫之表汝其師之承與阮瞻謝鯤鄧攸俱在越府越又與瞻等書曰小兒毘既無令淑之質不聞道德之風望諸君



時以開豫周旋誨接

殷仲堪為荊州刺史自在荊州連年水旱百姓饑饉仲堪食常五椀盤無餘肴飯粒落席間輒食以噉之雖欲率物亦緣其性真素也每語子弟云人物見我受任方州謂我豁平昔時意今吾處之不易貧者士之常焉得登枝而捐其本爾其存之

謝混與族子靈運瞻曜晦弘微以文義賞會常因酣宴之餘為韻語以獎勸靈運瞻等曰康樂誕通度

康樂靈運侯國

實有名家韻若加繩染功剖瑩乃瓊瑾宣明體遠識

宣

晦字穎達且沈雋若能去方執穆穆三才順阿多標獨解

阿多曜  
小字

弱冠慕華喬質勝戒無文其尚又能峻通遠懷

清悟

通遠  
瞻字

采采標蘭訊直轡鮮不躡抑用解偏吞微子

基微尚

微子即  
弘微也

無勅繇慕蘭勿輕一簣少進往將千仞

數子勉之哉風流繇爾振如不犯所知此外無所慎靈

運等並有誠厲之言唯宏微獨盡寢美初靈運父瑛無

才能為秘書郎早年而亡靈運好臧否人物混患之欲

加裁抑未有方也謂瞻曰非汝莫能乃與晦曜宏微等  
共遊戲使瞻與靈運登車便商較人物瞻謂之曰秘書  
早亡談者亦互有同異靈運默然言論自此衰止混歷  
位中書令中領軍尚書左僕射

宋陶潛為彭澤令有高節嘗與子書以言其志並為訓  
戒曰天地賦命有生必終自古賢聖誰能獨免子夏言  
曰死生有命富貴在天四友之人親受音旨發斯談者  
豈非窮達不可妄求壽夭永無外請故邪吾年過五十

而窮苦荼毒以家貧東西遊走性剛才拙與物多忤自  
量為己必貽俗患僂俛辭世使汝幼而饑寒耳常感孺  
仲賢妻之言敗絮自擁何慙兒子此既一事矣但恨隣  
靡二仲室無萊婦抱茲苦心良獨罔罔少年好書偶愛  
閒靜開卷有得便欣然忘食見樹木交蔭時鳥變聲亦  
復歡爾有喜嘗言五六月北牕下卧遇涼風暫至自謂  
是羲皇上人意淺識陋日月遂往緬求在昔眇然如何  
疾患以來漸就衰損故舊不遺每以藥石見救自恐大

分將有限也恨汝輩稚小家貧無後柴水之勞何時可  
免念之在心若何可言然雖不同生當思四海皆兄弟  
之義鮑叔敬仲分財無猜歸生伍舉班荆道舊遂能  
以敗為成因喪立功他人尚爾況共父之人哉潁川韓  
元長漢末名士身處卿佐八十而終兄弟同居至於沒  
齒濟北汜稚春晉時操行人也七世同財家人無怨色  
詩云高山仰止景行行止汝其慎哉吾復何言為命子  
詩以貽之曰悠悠我祖爰自陶唐邈其虞賓歷世垂光

御龍勤夏豕韋翼商穆穆司徒厥族以昌紛紜戰國漢  
漠衰周鳳隱于林幽人在邱逸虬撓雲奔鯨駭流天集  
有漢眷予愍侯於赫愍侯運當攀龍撫劍夙邁顯茲武  
功參誓山河啓土開封疊疊丞相允迪前蹤渾渾長源  
蔚蔚洪柯羣川載導衆條載羅時有默語運固隆汙在  
我中晉業馱長沙陶侃封長沙侯潛曾祖也桓桓長沙伊勲伊德天  
子疇我專征南國功遂辭歸臨寵不惑孰謂斯心而可  
近得肅矣我祖慎終如始直方二臺惠和千里潛祖茂為武昌

守太於皇烈考淡焉虛止寄跡夙運冥茲愠喜嗟余寡陋  
瞻望靡及顧慚華鬢負景隻立三千之罪無後其急我  
誠念哉呱聞爾泣卜云嘉日占爾良時名爾曰儼字爾  
求思溫恭朝夕念茲在茲尚想孔伋庶其企而厲夜生  
子遽而求火凡百有心奚待于我既見其生實欲其可  
人亦有言斯情無假日居月諸漸免于孩福不虛至禍  
亦易來夙興夜寐願爾斯才爾之不才亦已焉哉

何叔度為豫章太守子尚之以吏部郎告休定省傾朝

送別於治渚及至郡叔度謂曰聞汝來此朝中相送可有幾客答曰殆數百人叔度笑曰此是送吏部郎耳非關何彥德也昔殷浩亦嘗作豫章定省送別者甚衆及廢徙東陽船泊征虜亭積日乃至親舊無復相窺者王敬弘瑯琊臨沂人為侍中左光祿大夫子恢之被召為秘書郎敬弘為求奉朝請與恢之書曰秘書有限故有競朝請無限故無競吾欲使汝處於不競之地太祖嘉而許之



顏延之為金紫光祿大夫領湘東王師子竣既貴重權  
傾一朝凡所資供延之一無所受器服不改宅宇如舊  
嘗語竣曰平生不喜見要人今不幸見汝竣起宅謂曰  
善為之無令後人笑汝拙也延之閒居無事為庭誥之  
文曰庭誥者施於閨庭之內謂不遠也吾年居秋方慮  
先草木故遽以未聞誥爾在庭若立履之方規鑒之明  
已列通人之規不復續論今所載咸其素蓄本乎性靈  
而致之心用夫選言務一不尚煩密而至於備議者蓋

以網諸情非古語曰得鳥者羅之一目而一目之羅無時得鳥矣此其積意之方道者識之公情者德之私公通可以使神明加嚮私塞不能令妻子移心是以昔之善為士者必捐情反道合公屏私尋尺之身而以天地為心數紀之壽常以金石為量觀夫古先垂戒長老餘論雜用細制每以不朽見銘繕築末跡咸以可久承志況樹德立義收族長家而不思經遠乎曰身行不足遺之後人欲求子孝必先慈將責弟悌務為友雖孝不待

慈而慈固植孝悌非期友而友亦立悌夫和之不備或  
應以不和猶信不足焉必有不信儻知恩意相生情理  
相出可使家有參柴人皆由損夫內居德本外夷民譽  
言高一世處之逾嘿器重一時體之滋沖不以所能干  
衆不以所長議物淵泰入道與天為人者士之上也若  
不能遺聲欲人出已知柄在虛求不可校得敬慕謙通  
畏避矜踞思廣監擇從其遠猷文理精出而言稱未達  
論問宣茂而不以居身此其亞也若乃聞實之為貴以

辨畫所克見聲之取榮謂爭奪可獲言不出於戶牖自以  
為道義久立才未信於僕妾而曰我有以過人於是感  
苟銳之志馳傾軼之望豈悞已悟有識之裁入修家之  
誠乎記所云千人所指無病自死者也行近於此者吾  
不願聞之矣凡有智能預有文論若不練之多士較之  
羣言通才所歸前流所與焉得以成名乎若呻吟於牆  
屋之內喧囂於黨輩之間竊議以迷寡聞妲語以敵要  
詖是短筭所出而非長見所取適值尊朋臨座稠覽博

論而言不入於高聽人見棄於衆視則慌若迷塗失偶  
厲如深夜撒燭銜聲如氣腴嘿而歸豈識向之夸慢祇  
足以成今之沮喪耶此固少壯之廢爾其戒之夫以怨誹  
為心者未有達無心救得喪多見誚耳此蓋臧獲之為  
豈識量之事哉是以德聲令氣愈上每高忿言對議每  
下愈發有尚於君子者寧可不務勉邪雖曰常人情不  
能素盡故當以遠理勝之公竿除之豈可不務自異而  
取陷庸品乎富厚貧薄事之懸也以富厚之身親貧薄

之人非可一時同處然昔有守之無怨安之不悶者蓋有理存焉夫既有富厚必有貧薄豈其證然時乃天道若人富厚是理無貧薄然乎必不然也若謂富厚在我則宜貧薄在人可乎又不可矣道在不然義在不可而橫意去就謬生希幸以為未達至分蠶溫農飽民生之本躬稼難就止以僕役為資當施其情願庀其衣食定其當治遞其優劇出之休饗後之捶責雖有勸恤之勤而無霜曝之苦務前公稅以遠吏讓無急傍費以息流議

量時發斂視歲穰儉省贍以奉已損散以及人此用天之善御生之得也率下多方見情為上立長多術晦明為懿雖及僕妾情見則事通雖在畎畝明晦則功博若奪其常然後其煩務使威烈雷霆猶不禁其欲雖棄其大用窮其細瑕或明灼日月將不勝其邪故曰孱焉則差的焉則闇是以禮道尚優法意從刻優則人自為厚刻則物相為薄耕收誠鄙此用不忒所謂野陋而不以居心也含生之氓同祖一氣等級相傾迭成差品遂使

業習移其天識世服沒其性靈至夫願欲情嗜宜無間殊或役人而養給然是非大意不可侮也隅奧有竈齊侯蔑寒犬馬有秩管燕輕饑若能服溫厚而知穿弊之苦明周之德厭滋旨而識寡噍之急仁恕之功豈與夫比髮膚於草石方手足於飛走者同其意用哉罰慎其濫惠戒其偏罰濫則無以為罰惠偏則不如無惠雖爾眇末猶局庸保之上事思反己動類念物則其情得而人心塞矣扑博補塞會衆之事諧調哂謔適坐之方然



失敬致侮皆此之繇方其剋瞻彌喪端儼況遭非鄙慮  
將醜折豈若正其容而簡其事靜其氣而遠其意使言  
必詳慝賓友清耳笑不傾撫左右悅目非鄙無因而生  
侵侮何從而入此亦持德之管籥爾其謹哉嫌疑心  
誠亦難分豈惟厚貌蔽知之明深情怯剛之斷而已哉  
必使猜怨愚賢則嘖笑入戾耽愛犬馬則步顧成妖況  
動容竊芥束裝盜金又何足論也是以前王作典明慎  
議獄而僭濫易意朱公論壁光澤相如而倍薄異價此

言雖大可以戒小游道雖廣交義為長得在可久失在  
輕絕久繇相敬絕繇相狎愛之勿勞當扶其正性忠而  
勿誨心藏其枉情輔以藝業會以文辭使親不可褻疎  
不可間每存大德無挾小怨率此往也足以相終酒酌  
之設可樂而不可嗜嗜而非病者希病而遂肯者幾既  
肯既病將蔑其正若存其正性紓其妄發其惟善戒乎  
聲樂之會可簡而不可違違而不背者鮮矣背而非弊  
者反矣既弊既背將受其毀必能通其礙而節其流意

可為中和矣善施者唯發自人心乃出天則與不待積  
取無謀實並散千金誠不可能贍人之急雖乏必先使  
施如王丹受如杜林亦可與言交矣浮華怪飾滅質之  
具竒服麗食棄素之方動人勸慕傾人顧眄可以遠識  
奪難用近欲從若覩其淫怪知生於無心為見竒麗能  
致諸非務則不抑自貴不禁自止夫數相者必有之徵  
既聞之術人又驗之吾身理可得而論也人者兆氣二  
德稟體五常二德有竒偶五常有勝殺其及為人寧無

叶沴亦猶生有好醜死有天壽人皆知其懸天至於丁年垂遇中身迺合者豈可易地哉是以君子盡命愈難識道愈堅古人恥以身為溪壑者屏欲之謂也欲者性之煩濁氣之蒿蒸故其為害則煉心智耗真精傷人和犯天性雖生必有之而生之德猶火含烟而烟妨火桂懷蠹而蠹殘桂然則火勝則煙滅蠹壯則桂折故性明者欲簡嗜繁者氣昏去明即昏難以生矣是以中外羣聖建言所黜儒道衆智發論是除然有之者不患誤深

故藥之者嘗苦術淺所以毀道多而於義寡焉損盡誠  
難每指可易能易每指亦明之矣夫廉嗜之性不同故  
畏慕之情或異從事於人者無執人我之心不以己之  
所善謀人為有明矣不以人之所務失我能有守矣已  
所謂然而彼定不然奕棊之蔽悅彼之可而忘我不可  
學嘖之蔽將求去弊者念通作介而已流言謗議有道  
所不免況在闕薄難用筭防應物之方必出於已或信  
不素積嫌間所襲或性和物尤怨所聚有一于此何

處逃毀苟能反悔在我而無責於人必有達鑒昭其情  
遠識迹其事日省吾躬月料吾志寬嘿以居潔靜以期  
神道必在何恤人言嗒曰富則盛貧則病矣貧之病也  
不唯形色麤厲或亦神心沮廢豈但交友疎棄必有家  
人誚讓非廉深識遠者何能不移其操故欲蠲憂患莫  
若懷古懷古之志當自同古人見通則憂淺意遠則怨  
浮昔人琴歌編蓬之中者用此道也夫信不逆彰義必  
幽隱交賴相盡明有相照一面見旨則情固丘岳一言

中志則意入淵泉以此事上水火可蹈以此託友金石  
可弊豈待充其榮實乃將議報厚之篚篚然後圖終如  
或與立茂思無忽祿利者受之易易則人之所榮蠶穉  
者就之艱難則物之所鄙艱易既有勤倦之情榮鄙又  
間向背之意此二塗所為反也以勞定國以功施人則  
役徒屬而擅豐麗自理於民自事其生則督妻子而趨  
耕織必使陵侮不作懸企不萌所謂賢鄙處宜華野同  
秦人以有惜為質非假嚴刑有恒為德不慕厚貴有惜

者以理會有恒者與物終世有位去則情盡斯無惜矣  
又有務謝則心移斯不恒矣又非徒若此而已或見休  
事則慙慙結納及聞否論則處彰離貳附會以從風隱  
竊以成釁朝吐面譽暮行背毀昔同稽款今猶叛戾斯  
為甚矣又非唯若此而已或憑人惠訓藉人成立與人  
餘論依人揚聲曲存稟仰甘赴塵軌衰沒畏遠忌聞影  
跡又蒙蔽其善毀之無度心短彼能私樹已拙自崇常  
輩罔顧高識有人至此實蠹大倫每思防避無通閭伍



觀驚異之事或涉流傳遭卒迫之變反思安順若異從  
已發將尸謗人迫而又迂愈使失度能夷異如裴楷處  
逼如裴遐可稱深士乎喜怒者有性所不能無常起於  
褊量而止於弘識然喜過則不重怒過則不威能以恬  
漠為體寬愉為器者大喜蕩心微抑則定甚怒煩性小  
忍即歇動無愆容舉無失度則物將自懸人將自止習  
之所變亦大矣豈唯蒸性染身乃將移智易慮故曰與  
善人居如入芝蘭之室久而不知其芬與之化矣與不

善人居如入鮑魚之肆久而不知其臭與之變矣是以  
古人慎所與處唯夫金貞玉粹者乃能盡而不汙耳故  
曰丹可滅而不能使無赤石可毀而不可使無堅苟無  
丹石之性必慎浸染之繇能以懷道為念必存從理之  
心道可懷而理可從則不議貧議所樂耳或云貧何由  
樂此未求道意道者瞻富貴同貧賤理固得而齊自我  
喪之未為通議苟議不喪夫何不樂或曰溫飽之貴所  
以榮生饑寒在躬空曰從道取諸其身將非篤論此又

不通理用者凡養生之具豈間定實或以膏腴天性有以菽藿登年中散云所足在內不繇於外是以稱體而食貧歲愈嗛量腸而炊豐家餘食非粒實息耗意有盈虛耳況心得優劣身獲仁富明白入素氣志如神雖十旬九飯不能令饑藿席三屬不能為寒豈不信然且以已為度者無以自通彼量渾四極而輪五緯天道弘也振河海而載山川地道厚也一情紀而合流貫人靈茂也昔之通乎此數者不為剖判之行必廣其風度無挾

私殊博其交道靡懷曲異故望塵請友則義士輕身一  
遇拜親則仁人投分此倫序通允禮俗平一上獲其用  
下得其和世務雖移前休未遠人之適主吾將反本夫  
人之生暫有心識幼壯驟過衰耗驚及其間天爵既難  
勝言假獲存遂又云無幾柔麗之身亟委土木剛清之  
才遽為丘壤迴遑顧慕唯數紀之中耳以此持榮曾不  
可留以此服道亦何能久進退我生遊觀所達得貴為  
人將在合理合理之貴惟神與交幸有心靈義無自惡

偶信天德逝不上慙欲使人沈來化志符往哲勿謂是  
賒日鑿斯密若通此意吾將忘老如曰不然其誰與歸  
偶懷所撰述略布衆條若備舉情見願未書一瞻身之  
經別在田家節政奉終之紀自著燕居畢義

宋孔顛為安陸王子綏冠軍長史顛弟道存從弟徽顛營產  
業二弟請假東還顛出渚迎之輜重十餘船皆是縣絹  
紙席之屬顛見之偽喜謂曰我比困乏得此甚要因命  
上置岸側既而正色謂道存等曰汝輩忝預士流何至

東還作賈客耶命左右取火燒之燒盡乃去

蕭思話為開府征西將軍其子惠開為太子舍人時與汝南周朗同官友善以偏竒相尚後轉黃門侍郎與侍中何偃爭權表乞解職繇此忤旨免官思話素恭謹操行與惠開不同嘗以其峻異每加嫌責及見惠開自解表歎曰兒子不幸與周朗周旋理應如此杖之二百

冊府元龜卷八百十六

欽定四庫全書

子部  
冊府元龜卷八百  
十七至  
二十

詳校官中書臣孫球

侍讀臣孫球覆勘

總校官庶吉士臣何思鈞

校對官主事臣張培

謄錄監生臣阮鍾環

欽定四庫全書

冊府元龜卷八百十七

宋 王欽若等 撰

摠錄部

訓子第二

南齊劉懷民平原人仕宋為齊北海二郡太守子善明年四十刺史劉道隆辟為治中從事懷民謂善明曰我已知汝立身復欲見汝立官也

王僧虔為侍中兄子儉為朝宰起長梁齋制度小過僧虔



視之不悅竟不入戶儉即毀之僧虔嘗有書誡子曰知汝恨吾不許汝學欲自悔厲或以闔棺自欺或更擇美業且得有慨亦慰窮生但亟聞斯唱未覩其實請從先師聽言觀行冀此不復虛身吾未信汝非徒然也往年有意於史取三國志聚置床頭百日許復徙業就玄玄自當小差於史猶未近彷彿曼倩有云談何容易見諸玄志為之逸腸為之抽專一書轉通數十家注自幼至老手不釋卷尚未敢輕言汝開老子卷頭五尺許未知

輔嗣何所道平叔何所說馬鄭何所異指例何所明而  
便盛旋麈尾自呼談士此最險事設令袁令命汝言易  
謝中書挑汝言莊張吳興叩汝言老端可復言未嘗看邪  
談故如射前人得破後人應解不解即輸賭矣且論注  
百氏荊州八袞又才性四本聲無哀樂皆言家口實如  
客至之有設也汝皆未經拂耳瞥目豈有庖厨不修而  
欲延大賓者哉就如張衡思倖造化郭象言類懸河不  
自勞苦何繇至此汝曾未窺其題目未辨其指歸六十

四卦未知何名莊子衆篇何者內外八裘所載凡有幾家四本之稱以何為長而終日欺人人亦不受汝欺也繇吾不學無以為訓然重華無嚴父放勳無令子亦各繇已耳汝輩竊議亦當云阿越不學在天地間可嬉戲何忽自課謫幸及盛時逐歲暮何必有所減汝見其一耳不全爾也設令吾學如馬鄭亦必甚勝復倍不如今亦必大減致之有繇從身上來也汝今壯年自勤數倍許勝劣及吾耳世中比例舉眼皆是汝足知

此不復具言吾在世雖乏德業要復推排人間數十許  
年故是一舊物人或以比數汝等耳即化之後若自無  
調度誰復知汝事者舍中亦有少負令譽弱冠超越清  
級者於時王家門中優者則龍鳳劣者猶虎豹失蔭之  
後豈龍虎之議况吾不能為汝蔭正應各自努力耳或  
有身經三公茂爾無聞布衣寒素卿相屈體或父子貴  
賤殊兄弟聲名異何也體盡讀數百卷書耳吾今悔無  
所及欲以前車誠爾後乘也汝年入立境方應從官兼

有室累牽役中情何處復得下帷如王郎時邪為可作  
世中學取過一生耳試復三思勿諱吾言猶搗捷志輩

志輩為僧虔子  
志及彬寂等

冀脫萬一未死之間望有成就者不知

當有益否各在爾身已切身豈復關吾邪愧唯知愛深松  
茂栢寧知子弟毀譽事因汝有感故略叙胸懷耳

王志侍中特進僧虔子其弟寂建武初欲獻中興頌志  
謂之曰汝膏粱年少何患不達不鎮之以靜將恐貽譏  
寂乃止寂卒為秘書郎

呂安國為湘州刺史有疾徵為光祿大夫加散騎常侍  
安國欣有文授謂其子曰汝後勿作袴褶驅使單衣猶  
恨不稱當為朱衣官也

陳顯達為侍中鎮軍將軍有子十餘人誡之曰我本志  
不及此汝等勿以富貴凌人復謂其子曰麈尾扇是王  
謝家物汝不須捉此自隨

張融為司徒左長史永明中遇疾為門律自序曰吾文  
章之體多為世人所驚汝可師耳以心不可使耳為心

師也夫文豈有常體但以有體為常正當使常有其體	丈夫當刪詩書制禮樂何至因循寄人籬下且中代之	文其體闕變尺寸相資彌縫舊物吾之文章體亦何異何	常顛溫涼而錯寒暑綜哀樂而橫歌哭哉正以屬辭多	出比事不羈不阡不陌非途非路耳然其傳音振逸鳴	節竦異或當未極亦已極其所矣汝若復別得體者吾	不拘也吾義亦如文造次乘我顛沛非物吾無師無友	不文不句頗有孤神獨逸耳義之為用將使性入清波
-----------------------	-----------------------	------------------------	-----------------------	-----------------------	-----------------------	-----------------------	-----------------------

塵洗猶沐無得釣聲同利舉價如高俾是道場險成軍  
路吾昔嗜僧言多肆法辨此盡遊乎言笑而汝等無幸  
又云人生之口正可論道說義唯飲與食此外如樹網  
焉吾每以不爾為恨爾曹當振綱也臨卒又誡其子曰  
手澤存焉父書不讀沉父音情婉在其韻吾意不然別  
遺爾旨吾文體英絕變而屢奇豈吾天挺蓋不墮家聲  
汝可號哭而看之

周顥為中書侍郎有名於時子捨幼聰穎顥異之臨卒



謂曰汝不患不富貴但當將之以道德

王騫太尉儉之子為黃門郎司徒右長史性凝簡不狎當世嘗從容謂諸子曰吾家門戶本素族自然隨流可進不須苟求也

梁韋叡為護軍將軍散騎常侍雖老暇日猶課諸兒以學第三子稜尤明經史世稱其洽聞叡每坐稜便說書其所發摘稜猶弗之逮也

徐勉為中書令嘗為書誡其子崧曰吾家世清廉故常

居貧素至於產業之事所未嘗言非直不經營而已薄  
躬遭逢遂至今日尊官厚祿可謂備之每念叨竊若斯  
豈繇才致幸藉先代風範及以福慶故臻此耳古人所  
謂以清白遺子孫不亦厚乎又云遺子黃金滿籬不如  
一經詳求此言信非徒語吾雖不敏實有本志庶得遵  
奉斯義不敢墜失所以顯貴以來將三十載門人故舊  
亟薦便宜或使創闢田園或勸興立即店又欲舳舻運致  
亦令貨殖聚斂若此衆事皆距而不納非謂拔葵去織

且欲省其紛紜中年聊於東田間營小園者非存播藝  
以要利正欲穿池種樹少寄情賞又以郊際閑曠終可  
為宅儻獲懸車致事實欲歌哭於斯慧日十住等既應  
營婚又須住止吾清明門宅無相容處所以爾者亦復  
有以前割西邊施宣武寺既失西廂不復方幅意亦謂  
此逆旅舍耳何事須華嘗恨時人謂是我宅古往今來  
豪富繼踵高門甲第連闔洞房究其死矣定是誰室但  
不能為培塿之山聚石移菓雜以花卉以娛休沐用託

性靈隨便架立不在廣大惟功德處小以為好所以內  
中逼仄無復房宇近營東邊兒孫二宅乃藉十住南還  
之資其中所須猶為不少既牽挽不至又不可中途而  
輟郊間之園遂不辦保貸與韋黠乃獲百金成就兩宅  
已消其半尋園價所得何以至此繇吾經始歷年粗已  
成立桃李茂密桐竹成陰墜陌交通渠畎相屬華樓迥  
榭頗有臨眺之美孤峯叢薄不無糾紛之興瀆中並饒  
菰蔣湖裏殊富芰蓮雖云人外城闕密邇韋生欲之亦

雅有情趣追述此事非有希心蓋是筆勢所至耳憶謝靈運  
山家詩云中為天地物今成鄙夫有吾此園有之二十載矣  
今為天地物物之與我相校幾何哉此吾所餘今以分汝營  
小田舍親累既理亦須此且釋氏之教以財物謂之外命儒  
典亦稱何以聚人曰財况汝曹常情安得忘此聞汝所買姑  
熟田地甚為闕彌復可安所以如此非物競故也雖事異  
寢丘聊可髣髴孔子曰居家治理可移於官既已營之宜使  
成立進退兩亡便貽恥笑若有所收穫汝可自分贍內外大小

宜令得所非吾所知又復應沾之諸女耳汝既居長故  
有此及凡為人長殊復不易當使中外諧緝人無間言  
先物後已然後可貴老子云後其身而身先若能爾者  
更招巨利汝當自勗見賢思齊不宜忽略以棄日也棄  
日乃是棄身身名美惡豈不大哉可不慎歟今之所勅  
略言此意正謂為家已來不成資產既立墅舍以乖舊業陳  
其始末無愧懷抱兼吾年時朽暮心力稍殫牽課奉公  
略不克舉其中餘暇聊可自休或復冬日之陽夏日之

陰良辰美景文案間隙負杖躡屨道逢陋館臨池觀魚  
披林聽鳥濁酒一杯彈琴一曲求數刻之暫樂庶居常  
以待終不宜復勞家間細務汝交關既定此書又行凡  
所資須付給如別自茲以後吾不復言及田事汝亦勿  
復與吾言之假使堯湯水旱吾豈知如何若其溢庾盈  
箱爾之幸遇如斯之事並無俟令吾知也記云夫孝者  
善繼人之志善述人之事今且望汝述吾志則無所恨矣  
王筠為秘書監光祿大夫與諸兒書論家世集云史傳

稱安平崔氏及汝南應氏並累世有文才所以范蔚宗  
世擅雕龍然不過父子兩三世耳非有七葉之中名德  
重光爵位相繼人人有集如吾門世者也

沈少傅約語家人云吾少好百家之言身為四代之史  
自開闢以來未有爵位蟬聯文才相繼如王氏之盛者  
也汝等仰觀堂構思各努力

謝幾卿為威戎將軍南平王長史兄才卿早卒其子藻  
幼孤幾卿撫養甚至及藻成立歷官清慎皆幾卿獎訓



之力也世以此稱之藻歷官祭酒主簿

王褒著幼訓以誠諸子其一章云陶士行曰昔大禹不  
吝尺璧而重寸陰文士何不誦書武士何不馬射若乃  
立冬修夜朱明長日肅其居處崇其牆仞門無揉雜坐  
無號呶以之求學則仲尼之門人也以之為文則賈生  
之外堂也古者盤盂有銘几杖有誡進退修焉俯仰觀  
焉文王之詩曰靡不有初鮮克有終立身行道終始若  
一造次必於是君子之言歟儒家則尊卑差等吉凶隆

殺君南面而臣北面天地之義也鼎俎奇而籩豆偶陰陽之義也道家則墮肢體黜聰明棄義絕仁離形去智釋氏之義也義見苦斷集證滅修道明因辨果俾凡成聖斯雖為教差等而義歸汲引吾始乎幼學及於知命既崇周孔之教兼修老釋之談江左以來斯業不墜汝能修之吾之志也

何昌寓為侍中驍騎將軍從子烟嘗慕恬退不樂進仕昌寓謂曰求點皆已高蹈汝無宜復爾且君子出處亦

各一途求點皆何氏諸從也

後魏源賀為太尉遺令勅諸子曰吾頃以老患辭事不  
悟天慈降恩爵逮於汝汝其母傲吝母荒怠母奢佚母  
嫉妬疑思問言思審行思恭服思度遏惡揚善親賢遠  
佞目觀必真耳屬必正誠勤以事君清約以行己吾終  
之後所葬時服單襜足申孝心芻靈明器一無用也

刁雍為特進征南大將軍汎施愛士恬靜寡欲篤信佛  
道著教誡二十餘篇以訓導子孫

陸崇教訓六子雅有法度

楊椿為太保侍中致政椿臨行誡子孫曰我家入魏之始即為上客給田宅賜奴婢馬牛羊遂成富室自爾至今二十年二千石方伯不絕祿恤甚多至於親姻知故吉凶之際必厚加贈襚來往賓僚必以酒肉飲食是故親姻朋友無憾焉國家初士大夫好服綵色吾雖不記上谷翁時事然記清河翁時服飾見翁著布衣韋帶常約勅諸子曰汝等後世脫若富貴於今日者慎勿積金一

斤綵帛百疋已上用為富也又不聽治生求利又不聽  
與世家作婚姻至吾兄弟不能遵奉今汝等服乘以漸  
華好吾是以知恭儉之德漸不如上世也又吾兄弟若  
在家必同盤而食若有近行不至必待其還亦有過中  
不食忍飢相待吾兄弟八人今存者有三是故不忍別  
食者也又願畢吾兄弟世不異居異財汝等眼見非為  
虛假如聞汝等兄弟時有別齋獨食此又是不如吾等  
一世也吾今日不為貧賤然居住舍宅不作壯麗華飾

者正慮汝等後世不賢不能保守之方為勢家所奪北  
都時朝法嚴急太和初吾兄弟三人並居內職兄在高  
祖左右吾與津在文明太后左右於時口勅責諸內官  
十日仰密得一事不列便大瞋嫌諸人多有依勅密列  
者亦有太后高祖中間傳言構間者吾兄弟自相誠曰  
今忝二聖近臣居母子間甚難宜深慎之又列人事亦  
何容易縱被瞋責慎勿輕言十餘年中不嘗言一人罪  
過當時大被嫌責答曰臣等非不聞人語正恐不審仰

誤聖聽是以不敢言於後終以不言蒙賞及二聖間言語終不敢輒爾傳通太和二十一年吾從濟州來朝在清徽堂豫讌高祖謂諸王諸貴曰北京之日太后嚴明吾每得杖左右因此有是非言語和朕母子者惟楊椿兄弟遂舉爵賜兄及我酒汝等脫若萬一蒙時主知遇宜深慎言語不可輕論人惡也吾自惟文武才藝門望姻援不勝他人一旦登位侍中尚書四歷九卿十為刺史光祿大夫儀同開府司徒太保津今復為司空者正繇

忠貞小心謹慎口不嘗論人過無貴無賤待之以禮以是故至此耳聞汝等學時俗人乃有坐而待客者有驅馳勢門者有輕論人惡者及見貴勝則敬重之見貧賤則慢易之此人行之大失立身之大病也汝家仕皇魏以來高祖以下乃有七郡太守三十二刺史內外顯職時流少比汝等若能存禮節不為奢淫驕慢假不勝人足免尤誚足成名家吾今年始七十五自惟氣力尚堪朝覲天子所以孜孜求退者正欲使汝等知天下滿足



之義為一門法耳非是苟求千載之名也汝等能記  
吾言吾百年之後終無恨矣

崔光韶為廷尉卿永安末擾亂之際遂還鄉里誠子孫  
曰吾自謂立身無慙古烈但以祿命有限無容希進在  
官以來不冒一級官雖不達經為九卿且吾平生素業  
足以遺汝官闕亦何足言也吾既運薄便經三娶而汝  
之兄弟各不同生合葬非古吾百年之後不須合也然  
贈謚之及出自君恩豈容子孫自求之也勿須求贈若

違吾志如有神靈不享汝祀吾兄弟自幼及老衣服飲食未嘗一片不同至於兒女冠婚榮利之事未嘗不先以推第弟頃罹橫禍權作松襯亦可為吾作松棺使吾見之卒七十一孝靜初侍中賈思同申啓稱述光韶贈散騎常侍驃騎將軍青州刺史

甄琛為黃門侍郎時李謐博通諸經不就徵辟琛謂其子曰昔鄭玄盧植不遠數千里詣扶風馬融今汝明師甚邇何不就業也

北齊魏叔為左光祿大夫行齊州刺史以子姪少年申  
以戒勵著枕中篇其詞曰吾曾覽管子之書其言曰任  
之重者莫如身途之畏者莫如口期之遠者莫如年以  
重任行畏途至遠期惟君子為能及矣追而味之喟然  
長息若夫嶽立為重有潛載而不傾山藏稱固亦趨負  
而弗停呂梁獨浚能行歌而匪惕焦原作險或削踵而  
不驚九陔方集故眇然而迅舉五紀當定想宵乎而上  
征苟任重也有度則任之而愈固乘危也有術蓋乘之

而靡恤彼期遠而能通果應之而可必豈神理之獨爾  
亦人事其如一嗚呼處天壤之間勞死生之地攻之以  
嗜欲牽之以名利梁肉不期而共臻珠玉無足而俱致  
於是乎驕奢仍作危亡旋至然則上知大賢唯幾唯哲  
或出或處不常其節其舒也濟世成務其卷也聲銷迹  
滅玉帛子女椒蘭律呂諂諛無所先稱肉度骨膏脣挑  
怨惡莫生勲名共山河同久志業與金石比堅斯蓋厚  
棟不撓遊刃砉然逮於厥德不常喪其金璞馳騖人世

鼓動流俗挾陽日而謂寒包溪壑而未足源不清而流濁表不端而影曲嗟乎膠漆詎堅寒暑甚促反利而成害化榮而就辱欣戚更來得喪仍續至有身禦魑魅魂沉狴獄詎非足力不强迷在當局孰可謂車戒前傾人師先覺聞諸君子雅道之士遊遨經術厭飫文史筆有奇鋒談有勝理孝悌之至神明通矣審蹈而行量路而止自我及物先人後已情無繫於榮悴心靡滯於愠喜不養望於丘壑不待價於城市言行相顧慎終猶始有

一於斯鬱為羽儀恪居喪事知無不為或左或右則髦  
士攸宜無悔無吝故高而不危異乎勇進忘退苟得患  
失射千金之產徼萬鍾之秩投烈風之門起炎火之室  
載蹶而墜其貽宴或蹲乃喪其貞吉可不畏歟門有倚  
禍事不可不密牆有伏寇言不可而失宜諦其言端其  
行言之不善行之不正鬼執強梁人囚逕廷幽奪其魄  
明天其命不服非法不行非道公鼎為己信私玉非身  
寶過溜為紺踰監作青持繩視直置水觀平時然後取

未若無欲知止知足庶免於辱是以為必察其幾舉必慎於微知幾慮微斯亡則稀既察且慎福祿攸歸昔蘧瑗識四十九年非顏子仁幾三月不違跬步無已至於千里覆一簣進及於萬仞故云行遠自邇登高自卑可大可久與世推移月滿如規後夜則虧槿榮於枝望暮而萎夫奚益而不損孰有損而不害益不欲多利不欲大唯居德者畏其甚體真者懼其大道尊則羣謗集任重而衆怨會其達也則尼父栖遑其忠也而周公狼狽

無曰人之我狹在我不可而覆無曰人之我厚在我不可而咎如山之大無不有也如谷之虛無不受也能剛能柔重可負也能信能順險可走也能智能愚期可久也周廟之人三緘其口漏卮在前欹器留後俾諸來裔傳之座右

宋遊道為御史中尉兼太府卿剛直使氣每戒其子曰吾數遭屯蹇性自如此子孫不足以師之諸子奉父言柔謙遜



顏之推字介為黃門侍郎撰家訓二十篇行於世

後周于謹為太傅大宗伯參議朝政每教訓諸子務存  
靜退子孫繁衍皆至顯達當時莫比焉

賀若敦為忠州刺史鎮函谷為晉公護所怒徵還逼令  
自殺臨刑呼子弼語曰吾必欲平江南然心不果汝當  
成吾志吾以舌死汝不可不思因引錐刺弼舌出血誠  
以慎口

隋牛弘為右光祿大夫弘常謂其諸子曰吾受非常之

遇荷恩深重汝等子孫宜以誠敬自立以答恩遇之隆也

趙軌為齊州別駕其東鄰有桑椹落其家軌遣人悉拾還其主誠其諸子曰吾非以此求名意者非機杼之物不願侵人汝等宜以為誠

房彥謙居家每子姪定省嘗為講說督勉之亶亶不倦終於涇陽令

裴矩字弘大襁褓而孤及長好學頗愛文藻有智數世

父讓之謂矩曰觀汝神識足成才士欲求宦達當資幹世之務矩始留情世事後入唐朝官至民部尚書

唐李襲譽為太府卿每謂子孫曰吾性不好貨財遂至貧乏然吾近京城有賜田十頃耕之可以充食河內有賜桑千樹事之可以充衣江東所寫書讀之可以得官吾歿之後爾曹但能勤此一事亦何羨於人

房玄齡嘗誡諸子以驕奢沉溺必不可以地望陵人故集古今聖賢誡子書於屏風令各取其一因曰若能留

意足以保身成名又云我家累葉忠節是吾所尚汝宜  
師遵

王友貞琅琊人素好學於九經讀皆百遍訓誨子弟如  
嚴君焉

劉晏善訓諸子咸有學藝

李叔明建中初為東川節度及駕幸奉天其子昇翊從  
有功叔明每私疏誠勵見危臨難當誓以死昇奉父嚴  
訓果著勲效識者嘉之

穆寧通達體命不嘗服藥每誡諸子曰吾聞君子之事親養志為大直道而已慎無為諂吾之志也

張茂昭為武寧節度使自祿山之亂兩河繼為阻命之地茂昭表請舉族歸闕遣其妻李氏及男克讓克恭等先焉將行戒之曰爾曹將侍親出易定後之子孫勿為風俗所染吾無恨矣

田融魏博節度興之兄興幼孤融睦友而教導之會軍中分曹習射以角勝負興發矢連中融退扶而責曰爾

不能自晦取禍之道也故興於暴亂之時能全其身而

致其位

及興之節制六州請融為屬郡守朝  
廷察興誠不忍離其兄故特授焉

令狐彰為義成軍節度使臨行誡子以忠孝守節

柳玘為御史大夫玘嘗著書誡其子弟曰夫門第高者

可畏不可恃可畏者立身行己一事有墜先訓則罪大

於他人雖生可以苟取名位死何以見祖先於地下不

可恃者門高則自驕族盛則人之所嫉實藝懿行人未

必信纖瑕微累十手爭指矣所以脩己不得不懇為學

不得不堅夫人生世以己無能而望他人用以己無善而望他人愛無狀則曰我不遇時時不急賢亦猶農夫鹵莽種之而怨天澤之不潤雖欲弗餒其可得乎予幼聞先訓講論家法立身以孝悌為基以恭默為本以畏怯為務以勤儉為法以交結為末事以氣義為凶人肥家以忍順保友以簡敬百行備疑身之未周三緘密慮言之或失廣記如不及求名如儻來去奢與驕庶幾減過蒞官則潔已省事而後可以言守法守法而後言養

人直不近禍廉不沽名廩祿雖微不可易藜藿之膏血  
榘楚雖用不可忽褊狹之胸襟憂與福不偕潔與富不  
並比見家門子孫其先正直當官耿介特立不畏強禦  
及其衰也唯好犯上更無他能如其先遜順處已和柔  
保身以遠悔尤及其衰也但有暗劣莫知所宗此際幾  
微非賢不達夫壞名菑已辱先喪家其失尤大者五宜  
深志之其一自求安逸靡甘淡泊苟利於已不恤人言  
其二不知儒術不悅古道懵前經而不恥論當世而解



頤身既寡知惡人有學其三勝已者厭之佞已者悅之  
唯樂戲譚莫思古道聞人之惡揚之浸漬頗僻銷刑德  
義簪裾徒在廝養何殊其四崇尚慢遊耽嗜麴蘖以銜  
孟為高致以勤事為俗流習之易荒覺已難悔其五急  
於名宦匿近權要一資半級雖或得之衆怒羣猜鮮有  
存者茲五不韙甚於瘞疽瘞疽則砭石可瘳五失則巫  
醫莫及前賢明誠方冊具存近代覆車聞見相接夫中  
人以下修辭力學者躁進患失思展其用審命知退者

則業荒文蕪一不足採唯上智則研其慮博其聞堅其習精其業用之則行舍之則藏苟異於斯豈為君子

韓叔豐華州節度使建之父乾寧末建逼昭宗殺中山都將李筠教近衛諸軍害其八王冊德王為皇太子及李塘奔入鳳翔兼領同州乃修南莊起樓觀欲為南內行廢立之事叔豐見其跋扈謂建曰汝陳許一白丁乘時危亂位至方牧不能感君父之恩欲以同華兩州百里之地行其廢位覆族在旦暮矣吾不如先自裁免為

爾所累繇是建稍稍而沮其志

後唐符存審為幽州盧龍節度使檢校太師中書令嘗  
戒諸子曰予本寒家少小攜一劍而違鄉里四十年間  
位極將相其間屯危患難履鋒冒刃入萬死而無一生  
身方及此前後中矢至百餘乃出鏃以示諸子因以奢  
侈為戒

劉玘魏州人為縣令子贊幼有文性玘誨以詩書志學  
之年夏月青布襦單衫玘每食肉食別於牀下置蔬食

以飯贊謂之曰肉食君之祿也爾欲食肉則苦心文藝  
自可致之吾祿不可分也繇是贊既及冠有文辭三十  
餘舉進士

錢寬為抗越節度使鏐之父鏐嘗於臨安故里興造第  
舍窮極壯麗歲時遊於里中車從雄盛萬夫羅列寬每  
聞鏐至竄避之鏐即徒步訪寬請言其故寬曰吾家世  
田漁為事未嘗有貴達如此爾為十三州上將三面受  
敵與人爭利吾所以不忍見汝矣鏐即泣謝之

晉高漢筠在常山嘗戒其子曰吾遊歷多矣觀風俗淳厚以經術相尚罕得如此地者教子訓孫可為終焉之計因負郭鑿荒為田種樹成圃凡議婚嫁必接士人竟葬於常山從其欲也漢筠官至左驍衛大將軍內客省使

漢張瓘同州車渡村人故太原監軍使承業之猶子也承業佐後唐武皇莊宗有功甚見委遇瓘聞之與昆仲五人自故里奔於太原莊宗皆任用之瓘天祐十三年

補麟州刺史承業治家嚴毅小過無所容恕一姪為磁州副使以其殺河西賣羊客承業立捕斬之常誠瓘等曰爾等係車渡村百姓豈如劉開道等賊慣作非為今須改行若故態不除死無日矣故瓘所至不敢誅求

冊府元龜卷八百十七